

北京日報 第一百九十七册

代表人朱 淇

論 說

二月十二日

論國民對於憲法之義務

楊毓輝撰

憲法爲邦國之本舉君國之威權人民之義務立法司法之權限行政參政之機關皆受成於憲法憲法實國家之精神而治平之模範也論者徒驚泰西各國之富強而不知其富強根源實出於憲法組織蓋有憲法而後君民上下之倫億兆京垓之衆戶工兵刑之政典章制度之文胥服從於其下範圍不過曲成不遺君民之氣以通朝野之情以愜馴至政無不舉事無不成於戲憲法之功偉矣哉

日前 朝廷派五大臣出洋攷查各國政治憲政之萌芽已立而憲法之源流國民之義務社會中或未盡知查憲法之源源制雖成自近代而上古之世來格瓦之制度不啻斯巴達之憲法索倫之法典不啻雅典之憲法而我元公之周禮亦不啻中國之憲法無他皆爲國家之大經大法也今日之列國憲法發明於英而鼻祖於美及法蘭西風潮所播憲法遂漸徧於歐洲今歐洲除俄土外無不立憲法之國而其憲法之類有二一曰成文憲法即成典憲法又曰有形式之憲法一曰不成文憲法即不成典憲法又曰有實質之憲法蓋成文成典者整然勒爲邦國之法（如德法美憲法皆勒爲成典）故有形式之可求不成文不成典者隱然雜於法律之中（如英向未明定憲法而憲法實寓於法律之中及其習慣之事）故有實質而無形式而其立憲之國亦有二種一曰立憲君主國一曰立憲民主國此憲法之性質也今夫憲法者全國之法典所在即全國之利益所在君民上下實共享其成彼謂憲法偏重民權者在民主之國或然立憲君主之國未之聞也況西人愛國尊君同心禦侮實皆由憲法鼓勵而成蓋國家既明定憲法保護人民之利益則人民之對待國家自無不盡其忠誠而以勉其義務故其報國之義務關係憲法之大者有二一曰服兵役義務一曰納稅義務何謂服兵役義務世界之競爭日烈非兵不能衛國有國豈可無兵然在昔西國驅民爲兵民恒視爲賤役自憲法明定服兵役義務民遂視兵爲本分無不以衝鋒陷陣爲榮如德國現行憲法第五十七條云德國臣民均有服兵之義務此義務不得以他人代之普魯士憲法第三十五條云兵者總括常備後備諸部國王於戰時可依法律募集國民爲軍他國

憲法皆略國上既視為國家之干城下遂視為國民之責任蓋衛社稷即以衛身家相率急公仇而緩私仇先國事而後家事視國敵為天下之公敵視主憂為天下之共憂要皆憲法有以致之也
何謂納稅義務有國不能無費內政有費外政有費經常有費臨時有費用一國之財力供一國之度支例必徵稅於民義國憲法第二十五條云凡國民各財產之比例納稅以供國費普國憲法第一百一條云國稅不得特免德國現行憲法第五十八條云供帝國陸軍費之義務聯邦各國及其人民平等負之不得畸輕畸重故納稅以供國用為全國人民之義務無不當量力捐輸吾聞西一千八百五十四年法王拿破崙第三因用兵而籌餉下令募民債金錢二億五千萬佛郎而國民請納四億六千萬翌年復下令募民債金錢七億五千萬佛郎而國民請納三十六億五千萬此雖法人急公好義要亦憲法以納稅為義務用能鼓動其愛國之心也
總之憲法者實上下交益之法國家遵其法以保護人民斯盡國家之責任人民遵其法以捍衛國家是為人民之義務故有憲法維持於上下之間則朝野一心遐邇一體而國與民之關係遂有聯絡如一之勢而成團結不解之形此立憲君主之國所以強也彼謂憲法偏重民權者豈篤論哉

要緊新聞

三大臣行程○聞澤尚李三大臣家中接電云該大臣已於本月初八日行抵西亞不日即起程赴紐約然後趁船赴英云云

議准伊犁借款○伊犁將軍長留守奏請撥借新疆攤款四十萬以充練兵經費一摺現經戶部議准已電致新省所有應解本年攤款逕解甘肅藩庫收納毋庸匯交滬道云

日本外部大臣辭職○本館接東京專電云外部大臣加藤因反抗國內鐵路五年改為官辦一事自請辭職日廷現以西園寺公兼署商部外部

周冕被參消息○奉天來函云道員周冕前在黑龍江省經手草地木植稅項事件未將簿據開列報銷故該省將軍無從稽核聞已揭參此事其詳情俟訪明續登

奏請添設科道缺○日前都察院以科道缺多事簡奏請裁撤三十二缺該摺交政務處會同戶部核議已紀前報茲悉

王侍御步瀛日昨又上一摺以科道為言責之官所以察辦賢奸整綱飭紀既有可裁亦有應添云云
私墾地畝撥充學費○東陵青山嶺等處白椿界外青椿以內私墾地畝甚多現經豐陞阿查知已會同壽瀛壽全等奏請勘丈一律充為學堂經費

維西勦匪案列名請獎○雲南維西廳前因僧吏勾結叛亂焚燬教堂戕殺教士圍困官軍經滇督丁制軍派委署提督張松林督軍前往勦辦現已一律勦平督特將在事出力人員列名請獎已奉 旨張松林著交軍機處存記餘看兵部議奏

教士謀官案入誌○外務部近與駐京法使磋商謂南昌教案已有 旨着地方官嚴拿首要自當聽候該省查辦此刻切勿遽派兵艦駛赴南昌免致居民惶惑別生枝節法使業已允准

銅餅訂有合同○銅餅販運進口前經戶部飭禁在案現江西省以曾向西洋日本定購銅餅二千七百餘担經訂有合同此時萬難退回由滬道電請戶部通融辦理未悉戶部如何答覆

稟辦石油煤礦○石門縣產有石油煤礦礦質甚佳現華商稟請陝甘總督試辦并擬定章程由該督咨送商部酌核一俟經部核准後即行開辦矣

本京新聞

電覆岑督毋借洋款○前岑督岑雲帥致戶部電擬借洋債千萬辦理一切新政戶部以借洋債流弊甚重現各項關稅均已抵押故復電令另籌款項辦理新政無庸再借洋款

擬定俸餉章程○練兵處前經奏定陸軍人員任職章程不用候補名目日前王大臣會議支發俸餉辦法所有供職文武官員統領軍隊或辦各項兵事按其官階給以俸銀按其軍職支發薪俸庶官咸知上進而餉項不至虛糜矣

中俄議約之要聞○唐侍郎與俄使璞科第屢議中俄之約探其內容如下(一)唐侍郎請將辛丑年周冕私約作廢璞公使認為條約不認作私約唐侍郎則謂此約係私約(二)俄使請由俄人修怡克圖至庫倫以達張家口之鐵路唐侍郎答以此路已歸蒙古王公自辦未便改議(三)俄使請於黑吉兩省開通商埠而與俄人以相待最優

之利權唐侍郎亦未允(四)唐侍郎請將俄人從前私探之漠河金礦及呼蘭礦等一律退還而俄使欲歸作中俄

合辦唐侍郎亦未允(五)俄請援中日合辦鴨綠江岸森林事業之例而要求黑吉兩省之森林合辦權唐侍郎亦未允(六)俄請展修東清鐵路至黑龍江之支路唐侍郎謂此路中國已擬自築雖合辦亦難為詞云

擬訂徵兵章程○聞練兵處王大臣議以江甯等省舉辦徵兵之法必須擬定妥善章程通行各省一律舉行以歸劃一軍需運京○北洋陸軍轉運局派差押運企呢軍帽九千餘頂倪拉密林水壺九千餘具雨衣帽二千餘套乾糧袋四千箇皮靴八百雙於初九日由津裝火車運往北京第六鎮交納

商部擬頒商務全書○聞商部各堂議以中國商務漸次發達應將開辦成案頒發以資推廣現擬今春即將本部所有一切函牘稟件並紀事表格及各種章程編纂成書頒發各商會藉資考鏡

催解軍餉○畿輔駐防之江南自強軍歷由南洋大臣撥解餉銀現由准軍銀錢所借借銀五萬六千餘兩無款彌補日前戶部電催迅速解到以應急需幸勿再延云云

奏調參隨彙紀○出使俄國欽差大臣胡星使維德電請外務部速催新奏調之參贊候補道劉觀察士熙到俄接任又出使荷蘭國欽差大臣陸星使徵祥奏調候補道張觀察慶桐為參贊候補道王二尹廣圻景二尹德等為隨員云報律已交警部參酌○商部擬訂報律一事已迭錄前報茲又聞所訂報律因與警察有關已將全稿移送警部參酌云飭擬保教章程○聞內廷人云近日兩宮因聞某大臣面奏外間謠傳匪徒有排外風說深以為慮現飭政府妥訂保護外人及教堂章程通咨督撫將軍飭屬遵行以弭隱患而重邦父云

各省新聞

使俄隨員留滬○(江蘇)哈爾濱鐵路委員劉鏡人太守現由駐俄胡使電調赴俄劉以海道遲滯而爾比利亞鐵道俄亂未已未便冒昧進行特於昨日到滬拜會俄總領事商酌一切聞劉君已允電海參威俄督查明鐵路能否照常通行故太守現暫駐滬候信

福建銅幣局情形詳誌○(福建)福州南臺蒼霞洲銀圓局自歸官辦後兼鑄當十當五之銅元至壬寅年銅元流行全省并輪於他省該廠每日鑄幣將近百萬枚而市價每枚可當十三文於時該廠得利獨厚大有鼓鑄不及之勢閩前督魏光燾主張向日本購辦銅餅以便趕鑄然較之自鑄銅餅利益稍微及至去年每枚市價祇值十文該局利益

更見其微雖然三年之間所獲利益除一切消費以及津貼各學堂學費外尚能得利七十餘萬云茲將該局津貼各學堂全年之費錄下(學務處)九千六百兩(武備學堂)一萬二千兩(武備豫備科)一萬二千兩(全閩高等學堂)一萬三千二百兩(全閩師範學堂)四千八百兩(府立四城初等小學堂)二千一百六十兩(閩縣高等小學堂)七百二十兩(侯官高等小學堂)七百二十兩(公立高等小學堂)七百二十兩由是官場見銅幣之可獲利復於洪山橋地方創設銅幣局名曰西廠因管理者不得人遂致虧折去年政府整頓幣政該局因而停止委員及工匠一概撤去惟餘銅尚有數千遂向蒼霞洲銅幣局借匠數人將餘銅全數鑄盡然後撤局馬江船政提調高凌漢見銅幣獲利頗豐稟請督署創設銅幣局設於馬江船廠內去年政府整頓幣政之時該局亦議停辦惟欠款數十萬未能清還遂決議續辦俟欠款清還後撤局蒼霞洲銅幣局每日能鑄銅幣九十萬枚乃至百二十萬枚嗣因政府議定劃一幣政遂於今春議定每日限鑄三十萬枚且裁撤委員十二人以節經費其銅幣之模型改照政府所議定劃一之模聞已派委稽查委員陳某進京領模矣

川漢鐵路紀事○(四川)川漢鐵路未經開工不准擅動股款曾經昭示茲胡雨嵐太史出洋參攷聘請工程師特提二萬金作為遊歷川資當由錫清帥於研究所宣布

稟覆通州開埠事宜○(江蘇)通州開關商埠事現經江海關道會同鎮江關道查明該州近年出入各項貨值若干現在未設關以前歲收捐款若干將來開關徵稅可收銀若干以及該州出產大宗及各土產數目均開錄清摺詳請南洋大臣核奪

浙撫澈查釐金中飽○(浙江)浙省釐金歲徵二百餘萬然中飽之數亦幾與相等委員司巡無不視為利藪前年曾經整頓遽增數十萬金是其明證茲因財政困難浙撫張中丞因與寶方伯商議澈查通屬各局卡中飽實數悉數歸公不准隱匿私肥所有員司人等一律優給薪水照此辦法每歲可增度支百萬左右聞議定辦法準於二月間實行新店煤礦被擾○(東三省)錦州邊外新店地方煤礦頗佳有英商與華商合股開採名為華英公司設廠招工從事挖掘自錦屬馬賊苑五等猖獗以來該礦廠曾被搶掠現因賊匪益亂挖煤工人半多辭退甚難招募該煤廠幾有停工之勢云

湘鄂匪復燃○(湖北)湖北荊州府松滋縣與湖南邊境毗連向來土匪嘯聚其間乘機竊發去歲松屬祠堂崗會

匪滋事案經香帥札飭江永師營蔣子風管帶會同沙防營錢巨川都戎率領水陸弁兵一鼓蕩平首犯陳所亭就地正法要犯伍華甫盧謀恒伍清泉游元松伍家安李昌春六人均分別情罪輕重限年監禁其餘逸匪伍簡亭徐長發王晴山蔡占魁四人在逃未獲詎徐長發王晴山又倡松滋南岸澧州所屬東嶽廟茅草街及公安劉秀才小初家倡立紅都督會開創山堂散放飄布起事復仇當經祠堂崗團州伍朗山等邀同衆紳衿聯稟荆州道府兩署署稱松滋與澧江唇齒相依不特團不勝防抑且差不及捕現在湖南澧州業已調勇駐紮張市牛浪湖等處十分嚴緊誠恐彼拿此竄貽害閭閻不得已公懇調兵防守等語陳道憲閱稟隨即飛飭荆州將營帶迅派砲船兩艘星夜馳赴公安之石子灘一帶分頭駐紮一面由地方官購綫協緝務獲究辦

籌議改刑責爲罰款○(湖北)鄂督張香帥日來傳集司道各員籌議改刑責爲罰款以罪犯大小定爲額數並嚴禁州縣官營私舞弊違干嚴禁罰辦云

示發留學生赴東船票○(湖北)湘省留學日本諸生因去歲日本文部省發布取締一事紛紛回國現在條文改正諸生仍須赴東湘撫廳中丞體恤諸生特由公家備款發給赴東沿途船票飭員分赴漢滬兩處爲經理並署給零用費十元已面諭學務處牌示凡官費生及曾經咨送之自費生願赴日本者即日至本處報名以便預定船票如有不願去者亦即聲明若已回原籍不在省城者應由同學迅即函知免致誤云云

各國新聞

英藏條約與已核准○(英國)英大臣潤士曼回答其外部大臣古瑞云現所訂之英藏條約可以核准施行勿庸刪改以免多費周折

英人又倡議防範華工○(英國)英勳爵塞爾伯恩現任南非洲殖民部大臣在議院宣言云非洲之華工必須設法防禦否則恐有擾亂之患云

德國博士研查電綫與氣候之關係○(德國)德國天文學大家愛德姆博士就暴風雨時研究電綫之振動已非一日及至今日始就路傍電綫振動之音響查出一奇異之新現象可在數日前預知天時之結果據博士言謂電綫上有沉重之音響連續傳遞時是有風雨之前兆反之而有清澄之音響連續傳遞時是在四十八點鐘內有暴風驟雨

若在冬令呈此現象則爲雨雪之預報云

英製造廠之發達○(英國)英國蘇格蘭火車製造廠近日廠中製造之物極爲進步現又包攬南美洲并日本定造之貨件均須於一千九百零六年竣工

德水軍提督之言○(德國)德國水軍提督特爾畢斯氏在德國下議院聲稱德國雖不以青島爲要隘然自日俄戰事以後中國大局爲之一變德國必須在青島添築砲台一旦東亞有變可藉以自固不致爲其波及始稱善策云云

法委員公言○(法國)在阿爾西亞會議摩國問題時法委員瑞務爾南告德委員拉道威斯云現法政府決無反對摩國商務之意且所施行之政策必須與別國平等此事須在會議時當爲提議云

俄調駐日公使○(俄國)駐日使拿延烏利味亞氏得政府消息駐沙非亞俄使巴古味道夫氏已奉調爲駐日公使於此見俄國外務省不啻自表其無能蓋按巴氏之經歷必不能堪此重任而於近今日俄兩國交情親善更不待言今列國均更駐日公使館爲大使館惟俄國仍舊不改乃輕視日本爲二等之國是即俄國外交家之失策也

英工黨之壯言○(英國)英國新選工黨領袖凱爾哈的君立意與各黨派力戰不但英國本境且使英國全世界各統屬必盡歸其宇下始已

英國籌款賑濟日本荒民○(英國)日本歲饑英國爲善鄰起見現在所爾奔地方籌款以賑賑恤日本荒民聞認捐者頗形踴躍

英大臣失言○(英國)英太臣底爾克在議院宣言云國中無論男女已婚未婚已後均應得有投票選舉之權

調查

日本三十九年分歲入歲出總豫算表

(續)

官業及官有財產收入

郵政電信收入

森林收入

囚徒工錢及製造物收入

三〇二〇九四九一

四九七一四五四

一〇二二二一九

鹽物專賣收入	二六二七四八三一
腦專賣收入	九一二〇三九
官有物價收入	三三二〇九六
印刷局利金	二八六八六六
烟草專賣局利金	三〇二八九〇八九
東京砲兵兵廠利金	七八九
大阪砲兵兵廠利金	五四六
千住製絨所利金	三一四
鐵道利金	一〇一四六一二
電信燈臺用物製造所利金	一三〇〇
共計	一〇四四四九九三七
雜收	
報効等料	一七六二二九
醫藥費	九二七五八八
辦償及違約金	二八三六〇八
稅關雜收入	二一三六三〇
雜入	五九八三〇五
官吏遺族扶恤料收納金	一九八八六九
學校職員退老及遺族扶恤料收集金	八四三三〇
冲繩地方收入	六六二三
小笠原島地方收入	三四八
共計	二四八七五四〇

未完

宮門抄

二月十一日外務部 欽天監 侍衛處值日引 見 世榮謝授侍讀學士 恩 王中堂續假十日
召見軍機 聯芳

上諭

二月十一日

上諭從來敦篤邦交端在講信修睦朝廷與東西各國通商立約開誠布公固已情誼交孚毫無隔閡各國亦均稱歡洽親密有加中外相安實天下所共悉乃聞近日以來訛言四起適隅有不虞之暴動遂突生排外之謠傳市虎杯蛇衆情惶駭推原其故必由奸人播弄匪徒煽惑或思離間我交好或欲激怒我民心詭計陰謀莫可究詰關繫大局良非淺鮮不得不明白宣示一釋羣疑方今時局艱難正賴列邦互相聯絡庶幾寰宇協和豈有自啓猜嫌擾害治安之理我君臣上下惟當力戒因循勵精圖治以實心行實政期於漸致富強各處學生尤當深明忠愛爭自濯磨精修本業學成待用以儲精幹之才應遵照奏定學堂禁令章束身自愛尤不得干預外交妄生議論總之團體原宜固結三斷不可有仇視外洋之心權利固當保全而斷不可有違背條約之舉若士大夫宗旨不明愚民將何所倡導一有匪人乘機滋事必至貽害地方經此次宣諭之後著各省將軍督撫嚴飭該文武各官認真防範所有外國人命財產及各教堂均應一體切實保護即遇不平之事應候官爲理論如有造言生事任意妄爲者必非安分守法之人即着趕緊查拿立行究辦儻或防護不力致出重情定將該地方官從重懲處決不姑容該將軍督撫等務即剴切曉示隨時約束懲前毖後防患未然用副國家輯睦友邦保安黎庶之至意欽此

批摺摘由

宗人府奏已革貝勒載瀛生第三子請命名事奉 旨留 內閣奏擬 二龍廟封號願請 欽定事奉 旨圈出綏豐 綏疆錫福 又彙奏 上諭奉 旨留 又奏月摺奉 旨知道丁 吏部奏請 簡宗人府府丞事奉 旨留中又奏請 簡大理寺卿事奉 旨留中 又奏請 簡太僕寺卿事奉 旨留中 又奏請 簡翰林院侍講學士事

奉 旨留中 又奏留司員事奉 旨依議 內務府奏二月十一日 孝康章皇后忌辰祭 奉先殿後殿貝子毓肅
行禮事奉 旨知道了 又奏此次 京察官員等第事單一件奉 旨知道了 又奏查核 東陵籌修庫一年出入
銀兩數目事奉 旨知道了 又奏查核 東陵承濟壽修庫一年出入銀兩數目事奉 旨知道了 上駟院奏 京
察官員等第事單一件奉 旨知道了 單留 武備院奏 京察官員等第事單一件奉 旨知道了 單留 奉宸苑奏
京察院官員等第事單一件奉 旨知道了 單留 鑾儀衛奏轎片奉 旨知道了 領侍衛大臣奏初十日視 祝
嘏十一日祭 社稷壇擬派前引後扈後管事奉 旨知道了 稽察欽奉 上諭事件處彙奏各部奏已未完結事件
事奉 旨知道了 又奏八旗已未完結事件事奉 旨知道了 又彙奏 國史館功課事單一件奉 旨知道了
兵部奏北洋常備軍第一第二兩屆報銷 均奉旨知道 又伊犁屯特練軍報銷 均奉 旨知道了 又塔城收
支正雜各款報銷均奉 旨知道了
崇善奏閩海新關併稅項下備還賠款 該部知道 又閩海關洋藥釐金撥解賠款 該部知道

奏

稿

頭品頂戴江西巡撫臣胡廷幹跪 奏為知府丁憂開缺恭摺具陳仰祈 聖鑒事竊據布政使周浩詳稱據准補瑞
州府知府陸長佑稟稱係江蘇太倉州人由優增監生考充方略館謄錄官光緒二十年平定回苗各匪方略書成議叙
以通判分省試用二十四年在雲南思茅邊界中法接設電綫案內保俟補缺後以同知直隸州用二十六年西安
行在奉派軍機處官電尉當差兼辦隨 扈前路糧臺文案遵例報捐免補本班歸直隸州知州班分省試用二十七
年年十二月二十八日軍機大臣面奉 諭旨上年行在請立電報局在事各員承辦一切均無貽誤自應量予恩施
分省補用直隸州知州陸長佑著免補本班知府分省補用等因欽此遵例捐江西補用二十八年由吏部帶領引
覲奉 旨着照例發往欽此是年九月二十七日到省因前辦前路糧臺出力議准獎加三品銜原保知府重複改獎
俟補知府後以道員在任遇缺儘先即補五月初七日奉 硃批着照所請吏部知道欽此 奏補瑞州府知府接准
部覆尚未到任茲於光緒三十一年十一月十三日接到家信知親父繼輝於十月初十日在河南汝寧府任內病故例
應丁憂在江亦無經手未完事件擬於十一月十六日起程回籍守制等情由司詳請具 奏開缺前來臣覆查核無異

應准其回籍守制除分咨外理合恭摺具 奏伏乞 皇太后 皇上聖鑒敕部查照施行至所遺瑞州府知府
係稍衝不兼簡缺查現奉新章道府選缺出改為一咨一留上次南安府知府文炳升補鹽道遺缺業照新章歸部銓
選今瑞州府丁憂遺缺係留補之缺江西省現有應補人員容俟截缺後照例另行請補合併陳明謹 奏奉 硃批
吏部知道欽此

奉廷幹片 再准補鹽法兼巡瑞袁臨道文炳尚須送部引 見到任需時現署該缺之候補道繆德榮有稅務總局
會辦差使值此整頓稅務之際公事紛繁勢難日久兼顧應令專辦稅局所遺鹽法道印務查有奉調出洋甫經回省未
到任之正任南昌府知府沈曾植治理明通堪以令署理除分檄飭遵外謹會同署兩江總督臣周馥附片具陳伏乞
聖鑒謹奏奉 硃批吏部知道欽此

胡廷幹片 再據布政使周浩詳稱光緒三十一年秋季分奏調委署代理州縣印務所有試用知縣李德利委代理瑞昌
縣知縣龍南縣知縣楊煥委署會昌縣知縣試用直隸州判金沛田委代理饒寧縣知縣南康府經歷鄭自敦委代理建昌
縣知縣南昌府吳城鎮同知曾森桂委署靖安縣知縣胡惟賢委署清江縣知縣試用知縣汪都良委代理樂安縣知縣浮
梁縣縣丞梁啓熙兼代理鄱陽縣知縣饒州府照磨王洪達委代理浮梁縣知縣即用知縣汪春源委署建昌縣知縣補用知
縣濮賢懋委署德化縣知縣大挑縣知縣志堃委署信豐縣知縣共十二員造冊具詳前來臣覆核無異除清冊咨部外
理合附片具陳伏乞 聖鑒謹 奏奉 硃批吏部知道欽此

龐鴻書片 再臣准吏部咨開湖南試用道張鶴齡湖南補用道俞明頤經 盛京將軍趙爾巽奏請發往奉天補用奉
硃批著照所請該部知道欽此欽遵咨行到湘查張鶴齡現署湖南按察使兼辦洋務學務卓著精心湘省民氣向
來剛勁教養屢有轍轍自該員接辦洋務於今三年民教輯睦其時適值通商開埠當機因應力保地權仍不使遠人生
心是有功於外交於學務極力講求為之訂規則稽課程必使在堂諸生恂恂歸於純正間有一二不遵約束者立加淘
汰而不令害羣是有功於學界俞明頤素嫻兵略現充兵備處總辦前辦武備學堂三年畢業或遣之游學或留充差使
皆能於學科術科確有心得上年奉 旨改練新軍該員兼充協統第一第二標招募未久經該員認真訓練需以時
日可成勁旅又陸軍小學堂亦委該員督辦未便驟易生手該二員為湘省不可少之員雖奉天為根本重地而湖省亦
據江漢上游辦事需才實無二致臣忝膺重寄亟需通達時務道員相助為理惟有仰懇 天恩俯念湘省才難准將

張鶴齡命明頤仍留湖南藉資指臂之處出自 逾格鴻施至該二員思慮忠篤才識優長一堪監司之任一堪學問之材終升任撫臣端方舉薦人才奉 旨存記遇有相當缺出應如何 量加擢用斷自 宸衷非微臣所敢擅擬謹撮叙張鶴齡命明頤在湘實在政績附片奏留伏乞 聖鑒訓示謹 奏奉 硃批仍著前赴奉天欽此

湖北巡撫臣龐鴻書跪 奏為籌解俄法英德應還本息銀兩恭摺仰祈 聖鑒事竊准戶部咨每年應還俄法英德兩款本息擬由部庫及各省關分別認還又俄法英德借款佛郎磅價昂貴原撥銀數不敷照案酌量加撥內英德借款項下湖南原撥銀十四萬兩按二成五加撥銀三萬五千兩奏准自光緒二十六年起隨同原撥銀數分別匯解江海關道兌收等因業將湘省奉派原撥加撥認還英德一欸自光緒二十二年至三十一年十一月止還限解清先後 奏咨在案茲據布政使英瑞會同鹽道暨善後釐金各局詳稱光緒三十二年二月應解英德一欸在於抽茶糖百貨二成釐金項下動支銀三萬五千兩司庫裁兵節餉及新案減平欸內動支加二成五銀八千七百五十五兩總共庫平銀四萬三千七百五十五兩又匯費銀六百五十六兩二錢五分均於光緒三十一年十二月三十日發交大德通蔚泰厚號分領限於光緒三十二年正月二十九日匯解江海關兌收守候庫收批照回銷以期迅速詳請具 奏前來臣覆核無異除咨戶部外所有光緒三十二年二月分認還英德一欸應解原撥銀兩匯解江海關道查數緣由理合會同湖廣總督臣張之洞恭摺具 奏伏乞 皇太后 皇上聖鑒謹 奏奉 硃批該部知道欽此

龐鴻書片 再查新 賠款湖南省每年原派銀七十萬兩又部撥漕折銀兩自光緒二十七年十二月第一期起至三十二年正月第五十期止均經依限解清先後 奏咨在案茲據布政使英瑞會同鹽道暨善後釐金各局詳稱現值光緒三十二年二月第五十一期應解新案賠款在於新籌欸內動支鹽斤口捐加價銀四萬七千三百三十三兩零稅契銀一萬兩土藥加抽銀一千兩湊足一月償款銀五萬八千三百三十三兩零又 折銀一萬三千三百三十兩零連前共銀七萬一千六百六十六兩零復加關平補水銀一千一百七十七兩零發交協同慶等商號承領限於二月初一日匯交江海關道兌收守候批照回銷以期迅速而免逾限等情詳請 奏咨前來臣覆核無異除咨戶部謹會同湖廣總督臣張之洞附片具陳伏乞 聖鑒謹 奏奉 硃批該部知道欽此

湖南巡撫臣龐鴻書跪 奏為湘省設立農業學堂以重本務而利民生恭摺具陳仰祈 聖鑒事竊維周官重士會之法管子列地員之篇是明農為政令所關任土而人民可阜湘省南連黔粵多係山鄉 濱洞庭向稱澤國其間平原沃土只有此數農民終歲勤動僅足支持一遇偏災立形匱乏欲為謀生業廣闢利源惟有設立農業學堂以藉研究土宜宏開知識經前撫臣趙爾巽建設農務試驗場考究蠶桑種植雖已啟其端緒尚未擴厥規模且風氣初開正宜切實講求庶幾日有進步現在人民程度於高等農學實難驟幾今就該場改為中等農業學堂添設學舍增建蠶室購備需用器物遵照 奏定章程因地制宜擇其合於地方情形者分別農學蠶學林學三科兼營併舉互相發明一面派員督理改修一面招募學生勉期舉辦以速觀成臣又維實業重在試驗在堂學生非講學無以明其理非試驗無以盡其用如土壤地質物理巖石等事必有經驗乃能別良窳而利推行查有該學堂附近官地面積寬廣因建試驗園一區專購佳種如法種植以備學生研究之資基址已定再圖推廣務期農業大興教育普及以收國無惰農地少棄材之效該學堂開辦暨常年經費所需甚鉅湘省財力支絀本不易辦然農業為邦本所係不能不勉力為之已與善後局司道籌商設法撥用及時建設以仰副 朝廷興學重農之至意惟開辦伊始頭緒紛繁管理之法全視監督得人查有翰林院庶吉士林世燾學問素優講求農務擬即派為農務學堂監督除分咨吏部學部外所有設立中等農業學堂暨派充監督緣由理合恭摺具陳伏乞 皇太后 皇上聖鑒謹 奏奉 硃批該部知道欽此

胡廷幹片 再據布政使周浩詳據署饒州府轉據鄱陽縣知縣陳慶綬詳稱該縣于光緒十六年經部頒給光字一千二百四十六號印信蓋用年久篆文模糊請鑄換頒給詳請具 奏前來臣覆查無異除印臺清冊送部外謹會同署兩江總督臣周馥附片具陳伏乞 聖鑒敕部鑄換頒給查鄱陽縣與外省並無同名毋庸添鑄某省字樣合併陳明謹 奏奉 硃批禮部知道欽此

工部謹 奏為核銷江蘇留防各營採製軍火等項用過銀兩恭摺具奏仰祈 聖鑒事竊據前兩江總督魏光燾將江蘇留防各營光緒二十七八兩年採製軍火等於光緒三十年間先後奏明奉 旨該部知道欽此欽遵先後抄出到部嗣據該督將用過銀兩造具逐欸價值細冊送部核銷前來當經臣部將冊開製軍火等項數目是否相符移查兵部去後今准覆稱查江蘇留防各營光緒二十七八兩年採製軍火等項核與上案數目有減無增應准其製造等語臣部查冊開單該帳房旗幟號衣鉛丸火藥購買洋機衣褲靴帽包巾外洋物料等項共用庫平銀二十七萬三千六百六十四兩六錢四釐四絲二忽三微又修繕火藥庫房六座軍械所庫房一座自強軍建蓋學堂一座並製辦儀器等項共用庫平銀二萬二千二百七兩七錢三分四釐六毫三絲二忽六微又各營油粉燈油竹筴等項共用銀一萬四千七百

十九兩五錢九分八毫五絲二忽臣等派員按冊詳細覆核所開各款價值均與辦過成案相符亦與奏明銀數符合應
准開銷所有臣部核覆江蘇留防各營採製軍火等項用過銀兩准銷緣由理合恭摺具奏伏乞 皇太后

皇上聖鑒謹 奏光緒三十二年正月二十七日奉 旨知道了欽此

工部謹 奏為核銷塔爾巴哈台防軍採買軍火等項銀兩恭摺具奏仰祈 聖鑒事竊臣部前由內閣抄出署理

塔爾巴哈台參贊大臣伊黎 都統徐所 奏前任參贊大臣春滿任內五年收支各款銀兩造冊請銷一摺於光緒三

十一年十月十六日奉 硃批該部知道單併發欽此欽遵抄出到部嗣據該大臣將塔爾巴哈台防軍光緒二十六

年正月起到三十年十二月底止採買軍火添製鞘匣等項用過工料銀兩造具逐款價值細數繕冊送部核銷前來臣

部查冊開採買粗細洋火藥格林砲子銅火帽拉火等件又新募練軍添製金鼓鍋帳及運解餉項需用鞘匣並修補邊

界牌磚工料等項共用銀三萬六千七百零五兩一錢八分七釐五毫臣等督飭司員按冊詳細查核除新募練軍添製

金鼓鍋帳等項銀一千四百零七兩須併咨行該大臣轉飭局員查明聲覆再行核辦外共計臣部應銷銀三萬五千二

百九十八兩一錢八分七釐五毫細核所開價值均與歷屆辦過成案尚屬相符亦與 奏明銀數符合自應准其開銷

所有臣部核覆塔爾巴哈台採買軍火添製鞘匣等項用過銀兩數目准銷緣由理合恭摺具奏伏乞 皇太后

皇上聖鑒謹 奏光緒三十二年正月二十七日奉 旨知道了欽此

文苑

薊門

慶博如來稿

朔風如嘯萬山驚鼓角聲悲十二營(時董軍駐此)天際雁行來渤海薊東古塞接平城仙人藥餌無終洞太守威名

右北平倚遍城樓指烟樹布帆十尺挂新晴

津門

斜陽懷古不勝情望海樓頭月又生紫塞風雲趨象闕太行形勝拱 神京十三行省人初息七二名沾浪有聲聞道和

戎勞魏絳那堪流淚到臺澎

岱嶽

萬仞巖巖峻極天登臨人已地行仙夜看滄海三竿日晴望齊州九點煙上界星辰捫錯落下方風雨走盤旋東封莫漫

尋陳迹秦漢荒台夕照前

揚州

龍舟鳳舸繞芳菲錦作風帆翠作旂金機牙櫓千殿女迷樓仙子半宮妃李英乍解宮中唱柳絮先從河北飛梅雨一天

誰弔古蕪城遺跡自依稀

戶部銀行代收國民捐清單

捐戶姓名

銀數若干

八品首領孫進喜

庫平足銀一兩八錢八分

親軍 松 溥

庫平足銀四兩六錢九分

托克湍

庫平足銀九錢四分

景 福

庫平足銀九錢四分

景 順

庫平足銀九錢四分

德 光

庫平足銀九錢四分

英 秀

庫平足銀九錢四分

文 福

庫平足銀九錢四分

德 喜

庫平足銀九錢四分

玉 瑞

庫平足銀九錢四分

景 緒

庫平足銀九錢四分

海 泉

庫平足銀九錢四分

斌 懋

庫平足銀九錢四分

那 奇

庫平足銀九錢四分

松 蔭

庫平足銀九錢四分

松 蔭

庫平足銀九錢四分

順承郡王府弓

弓

匠

玉 銘 者

烏 布

隆 瑞

斌 厚

常 壽

銘 顏

啓 順

英 緒

連 桂

占 魁

玉 壽

英 啓

太 監

王 德 元

僕 婦 李 氏 母 女

趙 氏

郭 氏

王 氏

李 氏

芬 桂

胡 圖 哩

世 昌

庫平足銀九錢四分

庫平足銀九錢四分

庫平足銀九錢四分

庫平足銀九錢四分

庫平足銀九錢四分

庫平足銀九錢四分

庫平足銀九錢四分

庫平足銀九錢四分

庫平足銀九錢四分

庫平足銀四錢七分

庫平足銀三兩一錢二分

庫平足銀三兩

庫平足銀九錢四分

庫平足銀九錢四分

庫平足銀二兩八錢二分

庫平足銀九錢四分

庫平足銀九錢八分

庫平足銀九錢八分

庫平足銀九錢八分

庫平足銀九錢八分

庫平足銀九錢八分

庫平足銀九錢八分

庫平足銀九錢八分

庫平足銀九錢八分

庫平足銀九錢八分

庫平足銀九錢八分

庫平足銀九錢八分

庫平足銀九錢八分

庫平足銀九錢八分

庫平足銀九錢八分

庫平足銀九錢八分

庫平足銀九錢八分

庫平足銀九錢八分

庫平足銀九錢八分

庫平足銀九錢八分